

Efesas

Nægkiariien sə rani mə nəfe i nəkukuə

Ia nuk 60 Pol ramarə ia kalapus fwe taon nəha Rom nuk kəru, nənə mirai nəkukuə i revən ti nakalasia me rukurau ia taon nəha Efesas. Efesas in taon asori riti. Nægkiariien asori səvəi Pol ia nəkukuə i in i mə nəkur Isrel mine nərmama ripko mhə irəha nəkur Isrel tuhəuvehe mhəmwhen nīpwrai iərmama kuatia ia Kristo. Noien nəha ramesi pen nətərigien sə Kumwesən rīnamərkwafə irə fwe kupwən. Pol rini mə səuvehe mho kuatia ia Iesu Kristo, ro pen tsaməkeikei mhokeikei kitaha me. Pol ramahatən kitaha mə tsaməkeikei mharə ia nokeikeiien rəmwhen ia iərman rokeikei səvənhi pran, mine tata mine mama krouokeikei səvənrau iəkunouihi, mine slef trokeikei səvənhi iəmə asori. Pol raməgkiari mwi ia nakalasia me. Ripko mhə nousəsimwinien əpa səvənraha fwe Efesas, mətə nərmama səməme hahatətə ia Iesu Kristo rukurau ia tīprənə i. Pol rini mə Iesu rokeikei kitaha rəmwhen kitaha sokeikei nīpwrataha mine rəmwhen ia iərman rokeikei pran səvənhi. Ia nəkukuə i rusipekin ia nakalasia me mini mə irəha həmwhen ia nīpwrai Kristo, mhəmwhen ia nimwə riti sə Kumwesən rauvrhəkin, mhəmwhen mwi ia pran səvəi Kristo.

Nægkiariien sə rakupwən

¹ Iou Pol. Iou aposol riti səvəi Iesu Kristo ti nəri

nə mə Kumwesən rino rəmwhen ia sə in rokeikei muvehi utə iou mə tako.

Nəkukuə i rauvehe tukumiaha nərmama me səvənhi ia taon nəha Efesas kimiaha hiamahatətə pərhien ia Iesu Kristo.

² Nəfwakiiien səiou mə Kumwesən tata səkitaha mine Iesu Kristo Iərimənu səkitaha, trouəriari pehe namasanien mine nəməriniuen m kimiaha.

Kumwesən rəkwein amasan ia kitaha səməme səməuvehe mho kuatia kitaha Kristo

³ Pwəh səgnəgini Kumwesən i in Kumwesən mine Tata səvəi Iərimənu səkitaha Iesu Kristo. In rinəkwein amasan ia kitaha nərmama səməme səməuvehe mho kuatia kitaha Kristo, məriari pehe ia nənimwītaha mine narimnari amasan me pam səməme kamhəuku pen ia nitətə ia neiai.

⁴ In ruvərfi raka kitaha fwe tui nəpīn tīprənə ramiwən ihi, mə tsəuvehe mho kuatia kitaha Kristo, nənə mhəuvehe mho nəkur ikinan me səvənhi, tsatukwatukw pam ia nənimen. Tī nəri nə mə in rokeikei kitaha,

⁵ in rinəmri əpə raka kitaha fwe tui anan, mə kitaha tsəuvehe mho nīpwnətīn me ia Iesu Kristo. Noien nəha ramesi pen nətərigien amasan səvənhi mine nəfe in rokeikei mə tro.

⁶ Kumwesən ro iamīnhi irə mə tsaməgnəgini in tī namasanien səvənhi sə ramasan məpi raka. In rəriari pehe auər a namasanien nəha m kitaha saməuvehi raku pen tī Tini keikei.

⁷ Tī nəri nə mə kitaha səməuvehe mho kuatia kitaha min, niten rīfi nari ia kitaha, mo Kumwesən

1:2: 2Kor 1:2, Kol 1:2 **1:3:** Efes 2:6 **1:4:** Jon 15:16, 17:24, 2Tes 2:13, Efes 5:27, Kol 1:22 **1:5:** Jon 1:12 **1:6:** Mat 3:17, Kol 1:13
1:7: Efes 2:7, Kol 1:14,20

trəpwəh nərpwiniēn noien ərəha me səkitaha. Noien nəha ramesi pen namasaniēn səvənhi sə rasori pik anan.

⁸ In rətəgi irapw namasaniēn nəha m kitaha rəpi raka, mo kitaha səukurən mhətə sas ia narimnari me pam.

⁹ In ro pui pehe m kitaha nəfe in rinamərkwafə i fwe kupwən mokeikei mə tro. Nəri nəha ramesi pen nətərigiēn amasan səvənhi sə in tro kini nəghi Kristo irə.

¹⁰ Kumwesən tro nəri nəha ia nəpīn atukwatukw səvənhi, mousəsīmwin narimnari me pam ia neiai mine ia tīprənə həuvehe Kristo trasori ia nirəha.

¹¹ Kumwesən rīmərfi kimaha mwi mə kimaha tahəuvehe nərmama səvənhi, mho kuation kimaha Kristo. In ro iamīnha irə mesi pen nətərigiēn səvənhi sə in ruvəukurən raka fwe tui anan. In Kumwesən sə ramo narimnari me pam mamesi pen nətərigiēn səvənhi mine nəfe rokeikei mə tro.

¹² Nənə in rokeikei mə kimaha səməme iahəməukupwən mhəmri pen əknekin nətərigiēn səkimaha ia Kristo tahaməkeikei mhəgnəgini in ti nasoriēn səvənhi.

¹³ Nənə kimiaha mwi hiəməuvehe mho kuation kimiaha min nəpīn hiəregi nəgkariēn pərhiēn, nəgkariēn amasan sə Kumwesən rauvehimīru kimiaha irə. Ti nəri nə mə kimiaha hiəni nīpərhiēniēn ia Kristo, Kumwesən rəmri pen mak səvənhi ia kimiaha rahatən pen mə kimiaha nərmama me səvənhi. Mak nə in nə Nənimwin Ikinan sə Kumwesən rīməni mə truvei pehe.

¹⁴ Ti nəri nə mə Nənimwin Ikinan ramarə

1:9: Rom 16:25 **1:10:** Kal 4:4, Kol 1:16,20 **1:11:** Rom 8:28-29

1:13: Kol 1:4-6, Efes 4:30 **1:14:** 2Kor 1:22

ia kitaha, nənə, kitaha səukurən amasan mə Kumwesən truvei pehe pam narimnari amasan me nəha in rīnəmri karen mə səkitaha. Kitaha tsəuvehi narimnari amasan me nəha nəpīn Kumwesən trifi anan nari ia kitaha. Pwəh səgnəgini in ti nasoriien səvənhi!

Nəfwakiien mine nini viviiēn

¹⁵⁻¹⁶ Ro pen, ia nəpīn me pam iakani vivi Kumwesən tukumiaha, məpwəh nəpwəhien, ti nəri nə mə iakuvəregi raka kamini nahatətəien səkimiaha ia Iərimənu səkitaha Iesu, mine nokeikeiien səkimiaha sə ramevən ti nərmama me pam səvənhi. Ia nəpīn me pam iakani kimiaha ia nəfwakiien me səiou,

¹⁷ maməres Kumwesən səvəi Iərimənu səkitaha Iesu Kristo, Tata sə ramasan pik, mə in truvei pehe Nənimwīn səvənhi m kimiaha. Nənimwīn nəha tro kimiaha hiəukurən nari, mo pui Kumwesən m kimiaha mə tihəukurən amasan in.

¹⁸ Iakaməres mə fwe imwə ia rerimiaha nəmrimiaha trukuraan mə tihətə sas nəri nəha Kumwesən rīnəkwein kimiaha tukwe mini mə tihəmri pen əknekin nətərigien səkimiaha irə. Tihətə sas mwī ia narimnari amasan me rīpik səməme in truvei pen m nərmama me səvənhi,

¹⁹ mine niskaiien səvənhi sə rasori anan ia kitaha nərmama saməni nīpərhienien ia Kristo. Niskaiien nəha rəmwən ia niskaiien asori səvənhi

²⁰ sə in rīno Kristo irə rətui mwī ia nemhəien səvənhi, marə mo mwī in rəkure ia nīkaren mwatuk ia nitətə ia neiai.

²¹ Kwopun Kristo raməkure ikin in fwe irənhə anan məpi raka pam nənimwɪn me səməme kamhəuvehi nasoriien mine nərimənuien, məpi raka pam nəmə skai me mine nərimənu me. Rəmwhen a mwi nəhag sə Kumwesən rıməuvei pen min in irənhə anan məpi raka nahag me pam səməme kamini. Ripko mhə nəhag me əpa i səməme kamini ia nəpin i ipwet mine mətə nəhag me nəha mwi səməme tukini ia nəpin sə tripkuvehe.

²² Kumwesən rınəmri narimnari me pam kamharə inhəripw ia tıpage nisui Kristo nənə mo in ruvehe masori ia narimnari me pam. Ro iamınhi irə mə trasitu ia nakalasia me səvənhi.

²³ Nakalasia me nəha irəha nə nipwrai Kristo, Kristo rukuər ia nirəha, nənə ia noien a mwi nəha in rukuər ia narimnari me pam.

2

Kumwesən rıməuvehimiru kitaha ia namasanien səvənhi

¹ Fwe kupwən kimiaha hiəmwhen mə hiəuvamhə raka ti nəri nə mə hiamərui nəkwai Kumwesən, nənə mamho noien ərəha me.

² Fwe kupwən hiamavən mamho noien ərəha me nəha, mamhesi pen suatuk səvəi tıprənə i, mamhəkurirə iəremhə asori sə ramərimənu ia nənimwɪn ərəha me ia nımagouagou. In nəha nənimwɪn sə ramowok nəha təkwtəkwuni ia reri nərmama səməme kamhərui nəkwai Kumwesən.

1:22: Sam 8:6, Mat 28:18 **1:23:** Efes 4:10,15, Rom 12:5, Kol 1:18

2:1: Kol 1:21, 2:13 **2:2:** Kol 3:7, Taet 3:3, Jon 12:31, Efes 5:6, 6:12

³ Fwe kupwən kitaha pam səmwhen a ia nirəha. Noien ərəha me reritaha rokeikei pik kamhəiri kitaha samo nəfe nəghin nīpwrataha mine nətəriġien səkitaha krouokeikei. Ro pen ia noien səkitaha kitaha səmwhen a ia nərmama me pam səməme hamo niemaha raməpi pik Kumwesən.

⁴ Mətə Kumwesən napiien səvənhi rasori. Nokeikeiien rokeikei kitaha irə rasori pik anan,

⁵ mo in ruvei pehe nimiruien m kitaha nəpin səmwhen ia nərmama həuvamhə raka ia noien ərəha me, sətui mwi ia nemhəien kitaha Kristo. (Kumwesən rinasitu ia kimiaha ia namasanien səvənhi nənə muvehimīru kimiaha.)

⁶ Nənə ia noien nəha sə Kumwesən ro kitaha səməuvehe mho kuatia kitaha Iesu Kristo, in ruvehi utə kitaha min, səkure kitaha min ia nitətə ia nejai.

⁷ In rokeikei mə ia nəpin me səməme kamhəuvehe in trukurən noien nərmama hətoni namasanien i səvənhi rasori pik anan irau nokeikeiien krauvehe tukutaha ia Iesu Kristo.

⁸ Kumwesən rinasitu ia kimiaha ia namasanien səvənhi, nənə muvehimīru kimiaha, ti nəri nə mə hiaməni nīpərhiēnien ia Kristo. Narimnari me nəha rīpko mhə kimiaha atukw hiəno, mətə rəmwhen ia nari riti sə Kumwesən rīməuvei pehe auər a m kimiaha.

⁹ Ro pen ko iərmama riti rīpkəfiəutə atukw mhə in tukwe, ti nəri nə mə rīpko mhə kimiaha hiəno narimnari me nəha.

¹⁰ Ro iamīnhi irə ti nəri nə mə kitaha nərmama Kumwesən rino wok ia nimiruien səkitaha, mo

kitaha s̄auvehe mho kuatia kitaha Iesu Kristo m̄a kitaha tsamo noien amasan me. Kumwes̄an rin̄ap̄n̄ap̄en̄a raka ia noien amasan me n̄aha fwe kupw̄an m̄a kitaha tsamar̄a mamho.

N̄akur Isrel mine n̄armama r̄ipko mh̄a ir̄aha n̄akur Isrel

¹¹ Ro iam̄inhi ir̄a k̄imiaha n̄armama r̄ipko mh̄a k̄imiaha n̄akur Isrel ia n̄ipwramiaha rer̄imiaha tramr̄hi nar̄aien kupw̄an s̄akimiaha. N̄akur Isrel kam̄ini ir̄aha m̄a n̄armama kauvehi ninhum minraha ir̄aha kam̄h̄ani ̄ar̄aha k̄imiaha ti n̄ari n̄a m̄a k̄ipkuvehi mh̄a ninhum m̄ k̄imiaha. Nuvehien ninhum n̄aha iakani kamo ia n̄ipwrai īarmama, n̄armama kamho ia r̄aḡinraha.

¹² K̄imiaha rer̄imiaha tramr̄hi m̄a fwe kupw̄an k̄imiaha hiamar̄a Kristo riw̄an tukumiaha, k̄imiaha n̄akur irūa me, r̄ipko mh̄a k̄imiaha n̄akur Isrel, k̄imiaha n̄akur pw̄ispw̄is me, ko hīapkuvehi mh̄a narimnari me s̄am̄ame. Kumwes̄an r̄ino promes fwe kupw̄an m̄a truvei pen m̄ n̄armama me s̄av̄anhi. Fwe kupw̄an nar̄aien s̄akimiaha ia t̄akure t̄ipr̄an̄a i nari amasan riti riw̄an ir̄a s̄a tihameitenhi m̄a truvehe, n̄an̄a hīareirei anan Kumwes̄an.

¹³ Fwe kupw̄an k̄imiaha hiam̄ūv̄an isipw̄in ti Kumwes̄an, m̄at̄a t̄akwt̄akwuni hiam̄ūvehe mho kuatia k̄imiaha Iesu Kristo, n̄an̄a mh̄auvehe ipaka ti Kumwes̄an ia n̄ite Kristo.

¹⁴ Ro iam̄inhi ir̄a ti n̄ari n̄a m̄a Kristo in n̄a n̄am̄arinūien s̄akitaha in r̄ino kitaha n̄akur Isrel mine s̄am̄ame r̄ipko mh̄a kitaha n̄akur Isrel s̄auvehe mho kuatia. N̄apai kino ia k̄arūterēi

sə fwe kupwən ro kitaha saməmwəki kitaha me, rərpifi kitaha səpkuvehe mhə mho kuatia, Kristo rinousi ətestesi nəpai nəha rimwei ia nemhəien səvənhi.

¹⁵ In ruvehi raka Loa səvəi nəkur Isrel irəha natuakəmien me irə, mə in rukurən nuvi simwiniēn ia nipwran nəkur Isrel mine nərmama ripko mhə irəha nəkur Isrel krouvehe iərmama vi riti ia nirau. Ia noien nəha in rəmri nəməriniēn.

¹⁶ Ia nei kamarkuauī in rousəsimwīn kitaha pəri ia nipwran kuatia, mipeki kitaha səuvehe ti Kumwesən, mousi əpune noien i saməmwəki kitaha me.

¹⁷ In riməuvehe məvisau nəgkiariēn amasan səvəi nəməriniēn revən ti nərmama isipwīn ti Kumwesən, nənə məvisau mwi nəgkiariēn nəha revən ti nərmama ipaka tukwe.

¹⁸ Nənə ti nəri nə mə kitaha səməuvehe mho kuatia kitaha min, kitaha nəkur Isrel mine səməme ripko mhə kitaha nəkur Isrel kitaha pam səukurən nuvnimwəien ia Nənimwīn kuatia mhəuvən ti Tata Kumwesən.

¹⁹ Ro iamīnhi irə ripko mhə kimiaha nəkur iruə me rəmwən sə fwe kupwən, ripko mhə kimiaha nərmama pwispwis me, mətə kimiaha hiəuvəuvehe mhəno kuatia kimiaha nərmama ikinan me səvəi Kumwesən, kimiaha nərmama ia nəkwai nimwə səvənhi.

²⁰ Kuvrhəkīn nimwə nəha ia təkure nəri sə aposol me mine profet me hənəmri irapw. Iesu Kristo in rəmwən ia kəruətəri nəha kukupwən kukurei pen ia kona kostat kuvrhəkīn nimwə irə.

2:15: 2Kor 5:17, Kol 1:20,22 **2:16:** Sek 9:10 **2:17:** Aes 57:19

2:18: Efes 3:12 **2:19:** Efes 3:6, Hip 12:22-23 **2:20:** Mat 16:18,

1Kor 3:11

²¹ In raməkwtəmhiri pam nimwə nəha, mamō nimwə nəha rautə muvehe mo nimwə ikinan irə səvəi Iərimənu.

²² Ti nəri nə mə kīmiaha hiəməuvehe mho kua-tia kīmiaha min, in rauvehi mwi kīmiaha, mau-vrhəkin pen kīmiaha ia nimwə nəha, mə tihəuvehe mhəmwhen ia nimwə sə Kumwesən ramarə irə ia Nənimwin.

3

Pol in iərmama sə raməvisau m nərmama rīpko mhə irəha nəkur Isrel

¹ Ro iamīnhi irə, iou Pol, iərmama səvəi Iesu Kristo sə iakamarə ia kalapus tukumiaha nərmama rīpko mhə kīmiaha nəkur Isrel, iakaməfwaki tukumiaha.

² Rosi kīmiaha hiəuvəregi raka mə Kumwesən rino ramasan miou, muvei pehe wok i miou mə takasitu ia kīmiaha.

³ Rəmwhen ia nəgkiariien sə iakuvrai raka, məgkiari ouihi a irə, iakani mə Kumwesən rino pui pehe nari riti miou nari sə fwe kupwən ramərkwafə.

⁴ Nəpin hiəvsini nəgkiariien nəha, nənə tihəukurən nīpwrai nəgkiariien səiou ia nəgkiariien i raməgkiari ia Kristo, nəgkiariien sə ramərkwafə

⁵ kīpkini irapw mhə ti nīpwnəti nərmama me fwe kupwən, mətə təkwtəkwuni Kumwesən rino pui nəgkiariien nəha m aposol ikinan me mīne profet me səvənhi. In rino pui pen mīnraha ia Nənimwin səvənhi.

2:21: Efes 4:15-16, Kol 2:19, 1Kor 3:16 **2:22:** 1Tes 2:5 **3:1:** Efes 4:1, Fil 1:7,13, Flm 1,9 **3:2:** Kol 1:25 **3:3:** Efes 1:9-10, Kol 1:26

⁶ Nægkiariien naha ro iam̄inhi irə. Nərmama riṑko mhə irəha nəkur Isrel həuvəuvehe mhəno kuatia irəha nəkur Isrel nənə tuhəuvehi pəri nautə amasan me səməme Kumwesən rinəmri karen mə səvəi nərmama me səvənhi. Irəha tuhəuvehi pəri nəfe Kumwesən rino promes irə ia nəgkiariien amasan səvənhi truku pen ia Iesu Kristo.

⁷ Iou iasitu riti sə iakaməvisau irapw nəgkiariien amasan naha. Noien naha ramesi pen namasanien i Kumwesən ruvei pehe auər a miou ia niskaiien səvənhi.

⁸ Nəri auər a mə iou inhəriṑw anan ia nərmama me pam səvəi Kumwesən, mətə in ruvei pehe namasanien naha miou mə takəvisau m nərmama riṑko mhə irəha nəkur Isrel nautə me səvəi Kristo ko səṑkətə pam mhə.

⁹ Takaməkeiki mamō nərmama me pam hətə mhəukurən mə Kumwesən rəfo mo nətəriḡien səvənhi sə fwe kupwən ramərkwafə rier pehe. Ia nuk nuk me fwe kupwən Kumwesən sə rino narimnari me pam rinərkwafə nətəriḡien naha.

¹⁰ Kumwesən ro iam̄inhi irə ti nəri nə mə təkwtəkwi rokeiki mə tro nən̄imw̄in me səməme kamhəuvehi nasoriien m̄ine nər̄im̄anuien ia n̄imagouagou hətoni nukurənien səvənhi. Nukurənien naha səvənhi suatuk me səvənhi səṑəmsəṑə. Nənə irəha tuhətoni nukurənien səvənhi nəṑin irəha tuhətoni nakalasia me səvənhi.

¹¹ In i ramesi pen nətəriḡien səvənhi sə rinarə raka fwe tui nəṑin tiṑrənə ramiwən ihi, nənə

riməuvehe mo nɪpərhiɛniɛn irə ia Iesu Kristo lərimənu səkɪtaha.

¹² Tɪ nəri nə mə kɪtaha samahatətə irə, kɪtaha səməuvehe mho kuatia kɪtaha min, nənə ro iamɪnhi irə kɪtaha səukurən nuveheien mhərər ia nəmri Kumwesən mhəpwəh nehekɪriɛn.

¹³ Ro pen iakaməres kɪmiaha mə tihəpwəh noien nətərigiɛn səkɪmiaha rimwei ia nəmisəien sə iakamarə irə ia kwopun i. Iakamregi nəmisəien tukumiaha, nənə nəmisəien sə iakamarə irə truvehi utə kɪmiaha.

Pol raməfwaki tɪ nərmama me səvəi Iesu fwe Efesas

¹⁴ Mətə ia narimnari me nəha səməme iakuvəni raka, iakinimwi nukurhuk mi ia nəmri Tata Kumwesən,

¹⁵ sə in əpa in nukune nahag me səvəi nərmama me pam ia neiai mɪne təkure tɪprənə.

¹⁶ In rauvehi nasoriɛn sə rasori pɪk. Iakaməres in mə truvei pehe niskaiɛn m kɪmiaha tihəuvehi ruku pen tɪ Nənimwɪn səvənhi, nənə tro rerɪmiaha riskai tihərər əknekɪn.

¹⁷ Iakaməres in mə Kristo tramarə ia rerɪmiaha tɪ nəri nə mə kɪmiaha hiamahatətə irə. Iakaməres in mə tro nimɪruɛn səkɪmiaha rərər pen ia noien i səvəi Kristo sə ramokeikei nərmama, rəmwhen mə nuai nei raməkwtəmhirɪ tɪprənə, rəmwhen mə nimwə rəpwit pen əknekɪn ia tɪprənə sə ramərər ikɪn.

¹⁸ Ro iamɪnhi irə kɪmiaha nərmama me pam səvəi Kumwesən tihəukurən amasan nokeikeiɛn

3:12: Jon 14:6, Rom 5:2, Hip 4:16 **3:13:** Kol 1:24 **3:16:** Kol 1:11 **3:17:** Jon 14:23, Kol 1:23, 2:7 **3:18:** Kol 2:2

səvəi Kristo, rəmwhenimw pik, məpwəmwis pik, masori pik, mutə pik.

¹⁹ Nokeikeiien nəha səvəi Kristo iərmama ko rɪpkukurən pam mhə ti nəri nə mə rəpi raka nukurənien səvəi iərmama. Mətə iakaməfwaki mə tihəukurən amasan nokeikeiien nəha mə Kumwesən rukuər ia rerimiahā ia noien amasan me pam səvənhi.

²⁰ Təkwətəkwuni pwəh səuvehi utə nəghi Kumwesən! Ia niskaiien səvənhi sə ramo wok ia reritaha, in rukurən noien narimnari rəpi raka anan narimnari me pam səməme reritaha ramrhi uə saməres in tukwe.

²¹ Pwəh nəgnəginiiien revən tukwe in ia nuk nuk me mɪpko mhə sampam ti namasanien səvənhi kamətə ia nakalasia me mine Iesu Kristo. Ouəh, pwəh ro iamɪnhi.

4

Nərmama me səvəi Iesu Kristo həuvəuvehe mhəno kuatia

¹ Ro pen iou iərmama sə iakamarə ia kalapus ti Iərimənu səkitaha, iakamase kimiahā mə tihaməkeikei mharə ia narəien sə ratukwatukw rəmwhen sə Kumwesən rinəkwein kimiahā mə tiho.

² Tihamarə mamhəuvehi irapw nətərigien səkimiahā ia nəpin me, mhəpwəh nəfiəutəien kimiahā. Ia nəpin me pam tiho nətərigien səkimiahā rəpwəmwis, mhokeikei kimiahā me, nənə, mhəpwəh nəseniiien niemahā rəpi akwauakw kimiahā.

³ Nənimwɪn Ikinan rino kimiaha hiəuvehe mho kuatia, ro pen tihəmwur mharə ia nəmərɪnuien nəha sə rukurən noien kimiaha hiəuvehe mho kuatia ia nəpɪn me.

⁴ Iakani iamɪnhi irə ti nəri nə mə nɪpwrai Kristo kuatia a, Nənimwɪn kuatia a, rəmwhen a mwi nəri kuatia a ramasan hiameitenhi mə truvehe sə Kumwesən rɪnəkwein kimiaha tukwe.

⁵ Nənə Iərimənu kuatia a, nahatətəien kuatia a, pəptaes kuatia a,

⁶ Kumwesən səkitaha pam kuatia a, in Tata səkitaha pam. In ramərimənu ia kitaha pam, mamə wok ia nɪmiruien səkitaha pam, nənə mamarə ia reritaha pam.

⁷ Mətə kitaha kuatia kuatia saməuvehi nɪskaiien me səpəmsəpə ramesi pen namasanien sə Kristo rɪnəriari irə m kitaha.

⁸ Rəmwhen ia Nəkukuə Ikinan rani mə,

“Nəpɪn in rutə mevən fwe irənhə anan,

nənə miri nərmama səməme ruvehi irapw nɪskaiien səvənraha ia naruaɡənien,

miri irəha mevən kamho kalapus fwe imwəni,

nənə məriari pen narimnari amasan me m nərmama.”

⁹ Mətə nəɡkiariien i sə rani mə, “In rutə,” nɪpwran rani mə in rɪneiwaiu pehe ia tɪprənə i inhəripw anan.

¹⁰ Iərmama i sə rɪneiwaiu pehe, in iərmama kuatia sə rɪməutə mwi fwe irənhə anan məpi raka neiai mə in trukuer ia narimnari me pam.

4:3: Kol 3:14-15

4:4: Rom 12:5, Efes 2:16,18

4:5: Jon 10:16

4:6: 1Kor 12:6

4:7: Rom 12:3,6

4:8: Kol 2:15

4:9: Jon 3:13

¹¹ Nənə in rīməuvei pen niskaiien me səpəmsəpə m nərmama mə nepwīn tuhəuvehe mho aposol ia nirəha, nepwīn tuhəuvehe mho profet ia nirəha, nepwīn tuhəuvehe mho irəha nərmama səvəi nini irapwien nəgkiariien amasan, nepwīn tuhəuvehe mho pasta ia nirəha mine nahatən me.

¹² Kuvei pen niskaiien me nəha mīnraha mə irəha tuhasitu mhəpnəpenə ia nərmama me səvəi Kumwesən həukurən noien wok səvənhi. Wok nəha in nəha wok səvəi nuvrhəkinien nīpwrai Kristo.

¹³ Irəha tuho wok irə meste kitaha pam səuvehe mho kuatia ia nahatətəien səkitaha mine nukurənien səkitaha ramo nukurənien tī Tini Kumwesən, nənə kitaha səmwhen ia iərmama sə ruvəpwinari mhəmwhen a mwi ia Kristo.

¹⁴ Nənə ro iamīnhi irə kitaha tsəpkəmwhen mhə mwi ia nəkwərhakwərha, nahatənien eikuə me səvəi nərmama səməme kamho ikouikou tī niriiien nərmama ia mour ko həpko mhə kitaha səmwhen ia kinu riti sə təsi rauvsiniuvsini nənə nīmətagi raməpwi irapw mamevən.

¹⁵ Mətə kitaha tsaməkeikei mamhəni irapw nəgkiariien pərhiien, mamhəni irapw ia nokeikeiien, nənə mhəuvehe mhəpwinari ia narimnari me pam mhəmwhen ia Kristo. Kristo in kənkəpwə,

¹⁶ nənə kitaha səmwhen ia nīpwrān. In ramo kitaha səuvehe mho kuatia mhəmwhen ia nīpwrai iərmama kuvi tərini nīpərpərin me ia kwopun nīkəkrin me kamhəripin ikin, nənə nəpin nīpərpəri nīpwrān nəha kamho wok me səvənraha kuatia kuatia, nīpwrān pam ruvehe mīpwinari, nənə

mamo in atukw ruvehe mamskai mwi ia nokeikeien.

Kitaha tsamakeikei mharə mhəmwhen ia nipwnəti nukuraanien me

¹⁷ Ro pen ia nəghi Iərimənu səkitaha iakani pehe skai tukumiaha mə kimiaha tihəpwəh mwi narəien rəmwhen ia nərmama səməmə həreirei Kumwesən. Irəha kamharə məmhesi pen nətərigien səvənraha sə ro nəri auər a irə.

¹⁸ Nətərigien səvənraha raməmak ia nəpitəvien. Irəha isipwɪn ti nimiruien səvəi Kumwesən ti nəri nə mə kənkəpwənraha riskai, həreirei nari.

¹⁹ Irəha hənəpwəh naurisien, mhəsəni pen atukw a irəha ia noien ərəha mamho noien əmkemik me səpəmsəpə, kə kipkuvi raka mhə irəha irə ti nəri nə mə hokeikei pik.

²⁰ Mətə nəpɪn kɪnahatən kimiaha ia Kristo, nahatənien nəha ropə anan ia sə nəha!

²¹ Kimiaha hiəuvəregi raka nəgkiariien səvənhi. Ti nəri nə mə kimiaha nərmama me səvənhi, nərmama hənahatən raka kimiaha ia nəgkiariien pərhiən sə ruku pen ti Iesu,

²² mhahatən kimiaha mə tihaməkeikei mharaka ia noien akuas me səkimiaha səməmə hiənamo ia narəien səkimiaha fwe kupwən. Noien me nəha hiamokeikei pik kamheikuə ia kimiaha mamhouraha kimiaha.

²³ Nimiruien mine nətərigien səkimiaha tuhaməkeikei mhəuvehe mhərməvi mwi.

²⁴ Nənə kimiaha tihaməkeikei mharkahu ia nimiruien vi. Nimiruien vi nəha in nəha iərmama

vi sə Kumwesən rino mə trəmwhen irə. In rino iərmama nəha mə tratukwatukw pərhiən, məmher.

²⁵ Kimiaha pam tihaməkeikei mhəpwəh noien səvəi neikuəien, nənə mamhəni a nīpərhiēnien m kimiaha me, ti nəri nə mə kitaha pam kuatia ia nīpwrai Kristo.

²⁶ Trini minuə niemaha raməpi kimiaha, rərəha mə hio noien ərəha riti. Tihəpwəh nuvehien niemaha meste meri rivə,

²⁷ kamo hiəuvei pen kwənmahan m Setan.

²⁸ Iərmama sə ramakres traməkeikei məpwəh noien nəha. In traməkeikei mamsese, mamowok sə ramasan ia rəgin mə in rukurən nasituēn ia nərmama nautə səvənrəha riwən.

²⁹ Tihəpwəh niniēn nəgkiariēn ərəha ia tərhumiaha, mətə tihəni a nəgkiariēn amasan sə rukurən nasituēn ia nərmama səməme həpou həuvehe mhəskai mwi. Nəgkiariēn nəha rukurən nasituēn ia nərmama səməme kamhəregi.

³⁰ Tihəpwəh noien Nənimwin Ikinan riregi rərəha tukumiaha, ti nəri nə mə Nənimwin nəha rəmwhen ia mak riti sə Kumwesən rinəmri raka ia kimiaha ramahatən pen mə ia nəpīn sampam in treivinari ia kimiaha.

³¹ Kimiaha tihaməkeikei mhəpwəh nəgkiariēn əfiə me pam, mine niemaha, mine nətəpahariēn, mine niniēn nīkare iərmama irəha nəmwəkien me pam.

³² Kimiaha tihaməkeikei mho ramasan m

4:25: Kol 3:8-9, Sek 8:16 **4:26:** Sam 4:4, Jem 1:19-20 **4:28:** 1Tes 4:11 **4:29:** Efes 5:4, Kol 3:8, 4:6 **4:30:** Aes 63:10, 1Tes 5:19, Efes 1:13-14 **4:31:** Kol 3:8 **4:32:** Mat 6:14, Mat 18:22-35, Kol 3:12-13

kimiaha me, nənə mho rerimiaha riməru tukumiaha me. Trini minuə kimiaha riti ro rərəha m kimiaha riti mwi, tihenouenou irə rəmwhen ia Kumwesən rinenouenou ia noien ərəha me səkimiaha ti nəri nə mə hiəuvəuvehe mhəno kuatia kimiaha Kristo.

5

¹ Ro pen tihousari mə tihəmwhen ia Kumwesən ti nəri nə mə kimiaha nipwnətın me in rokeikei pik kimiaha.

² Tihamarə mamho nokeikeiien rəmwhen ia Kristo rokeikei kitaha nənə muvehe memhə tukutaha. Nemhəien səvənhi rəmwhen ia nəri kauvani ia təkure nifatə nipekin rapein amasan kauvei pen m Kumwesən.

³ Ti nəri nə mə kimiaha nərmama me səvəi Kumwesən nənə tihəpwəh anan noien nari riti mə tukini ərəha kimiaha tukwe. Iakani noien ərəha me rəmwhen ia nərman mine nipran kamhəiri əpnəpen irəha me, mine noien ərəha me pam səməme ro a naurisien, mine noien i iərmama rerin ramakres.

⁴ Ripkamasan mhə mə tihəni nəgkiariien sə ro naurisien ti ninien, uə nəgkiariien ərəha, uə nəfkəmanəien ərəha, uə naien. Nəgkiariien me iaminha irə ripkatukwatukw mhə mə tihəni. Mətə tihəni tanak m Kumwesən ti narimnari səməme in ramo m kimiaha.

⁵ Tihaməkeikei mhəukurən nəri i mə pran uə iərman sə ramo əpnəpen nari, uə iərmama sə ramo noien ərəha sə ro a naurisien, uə iərmama sə rerin ramakres, (iərmama nəha rəmwhen mə

5:1: Mat 5:48 5:2: Rom 14:15, Kal 2:20, Hip 10:10, Eks 29:18

5:3: Kol 3:5 5:4: Efes 4:29 5:5: 1Kor 6:9-10, Kol 3:5

raməfwaki pen m nənɪmwɪ nari), kwopun riti səvənhi riwən mə trevən muvehi ia nɪtətə sə Kristo mine Kumwesən krauərɪmənʉ irə.

⁶ Tihəpwəh nəseniien mə iərmama riti truvei pen kɪmiaha ia nəgkiariien eikuə me səvənhi səməme nɪpərhiien riwən irə. Iakani iamɪnhi irə ti nəri nə mə noien ərəha me nəha kamho Kumwesən niemaha raməpi, nənə in trərpwɪn noien ərəha me səvəi nərmama səməme kamhərui nəkwən.

⁷ Ro iamɪnhi irə kɪmiaha tihəpwəh navən pəriien kɪmiaha nərmama me səməme ho iamɪnha irə.

⁸ Fwe kupwən kɪmiaha hiamarə ia nəpitəvien, mətə təkwtəkʉwuni ti nəri nə mə hiəuvəuvehe ti Iərimənʉ səkitaha, hiənarə ia nukuraanien. Ro iamɪnhi kɪmiaha tihaməkeikei mharə mhəmwhen ia nɪpwnəti nukuraanien me,

⁹ ti nəri nə mə nukwai nukuraanien kamətoni ia noien me pam səməme hamasan, mhatukwatukw, mho nɪpərhiien.

¹⁰ Nənə tihousari mhətui ia noien me səməme Iərimənʉ səkitaha rerɪn ragien tukwe.

¹¹ Tihəpwəh nukurirəien nərmama me səvəi nəpitəvien mhəpwəh noien noien ərəha kɪmiaha mɪnraha. Nəri amasan riwən ia noien me nəha. Mətə tihəuvehi noien me nəha mhəuvehe ia nukuraanien.

¹² Nɪpərhiien ro a naurisien mə tikini narimnari me səməme irəha kamho afafa,

¹³ mətə narimnari me pam nukuraanien raməhiəpwɪn həuvehe mho nɪpwrən kamətoni.

¹⁴ Ro iamɪnhi irə ti nəri nə mə nəpɪn nukuraanien

5:6: Kol 2:4,8, Rom 1:18 **5:8:** Efes 2:11,13, Kol 1:13, 1Tes 2:9, Jon 12:36 **5:10:** Rom 12:2 **5:11:** 2Jon 10-11 **5:13:** Jon 3:20-21

5:14: Aes 26:19, 60:1, Rom 13:11

raməhiəpwɪn nari riti, nəri nəha ruvehe mo nukuraanien irə. Ro iamɪnhi irə kani mə,

“Ik sə ikamapri, ikətui rə,
mətui mwi ia nemhəien səim,
pwəh Kristo rəhiəpwɪn ik.”

¹⁵ Ro pen tihətui amasan ti narəien səkimiaha mə hiaməfarə irə. Rərəha hiamarə mhəmwhen nərmama həreirei nari, mətə tihaməkeikei mharə mhəmwhen ia nərmama səməme həukurən nari.

¹⁶ Nənə trini minuə hiətoni suatuk səvəi namasanien, hiesi pen ti nəri nə mə ipwet mine samarə ia nəpɪn ərəha.

¹⁷ Həpwəh nireireien nari, mətə tihəmwur mhəukurən nəri sə Iərimənu səkitaha rokeikei.

¹⁸ Tihəpwəh nakonəien nənimwiiien skai rəmwhen ia waen ti nəri nə mə tro kəmkapwəmiaha rətə wau miri pen kimiaha ia noien ərəha. Mətə pwəh Nənimwɪn Ikinan rukuər ia kimiaha.

¹⁹ Tihəgkiari m kimiaha me ia nɪpu me ia nəkukuə nəha Ol Sam, mine nɪpu me səvəi nəfwakiiien, mine nɪpu me səməme kamhəuku pen ia Nənimwɪn Ikinan. Nənə tihani nɪpu me ia rerimiahə ti nəgnəginiien Iərimənu.

²⁰ Ia nəghi Iesu Kristo Iərimənu səkitaha, tihəməni tanak m Tata Kumwesən ti narimnari me pam ia nəpɪn me.

²¹ Kimiaha tihaməkeikei mhəsiai kimiaha me ti nəri nə mə kimiaha hiaməsiai Kristo.

Nɪpran me mine nərman me səvənraha

5:17: Rom 12:2, Kol 1:9
33:2-3

5:20: Kol 3:17

5:18: Luk 21:34
5:21: 1Tes 5:5

5:19: Kol 3:16, Sam

²² Kìmiaha nìpran me, tìhaməkeikei mhəsiai nərman me səkìmiaha rəmwhen hiaməsiai Iərìmənu səkitaha.

²³ Iakani iamìnhi irə tì nəri nə iərman in kənkəpwə rasori ia pran səvənhi rəmwhen ia Kristo in kənkəpwə rasori ia nakalasia me səvənhi. Nakalasia me nəha irəha həmwhen ia nìpwrai Kristo, nənə in rauvehimìru irəha.

²⁴ Rəmwhen ia nakalasia me kamhəsiai Kristo, pwəh nìpran mwì kamhəsiai nərman me səvənraha ia narimnari me pam.

²⁵ Kìmiaha nərman me, tìhaməkeikei mhokeikei nìpran me səkìmiaha rəmwhen ia Kristo rokeikei nakalasia me səvənhi, nənə məseni nìmìruien səvənhi tì nìrəha.

²⁶ In rìmamhə tì nìrəha mə trəmri karen irəha mə səvəi kumwesən, məpərhi irəha ia nui irau nəgkiariien səvənhi.

²⁷ In rìno iamìnha irə mə in trukurən nərpwì irəpwien nakalasia me səvənhi ia nənimen, irəha tuhəmwhen ia pran riti tìnari səvənhi ramasan pìk, nəmkemikien uə nəri pitəv uə nari riti iamìnhi riwən, mətə irəha tuhəmher, mhatukwatukw pam.

²⁸ Ia noien a mwì nəha, nərman tuhaməkeikei mhokeikei nìpran me səvənraha rəmwhen mə irəha kamhokeikei atukw a nìpwranraha. Iərman sə rokeikei pran səvənhi, in rokeikei atukw a in.

²⁹ Iakani iamìnhi irə tì nəri nə mə iərmama riti riwən sə raməmwəki atukw ia nìpwran, mətə in raməni amasan nari mə tro nìpwran ruvehe mìskai, nənə mamətui amasan tì nìpwran

5:22: Kol 3:18, 1Tes 3:1
3:19, 1Tes 3:7, Kal 1:4

5:23: 1Kor 11:3, Efes 1:22
5:26: Taet 3:5, Hip 10:10

5:25: Kol
5:27: 2Kor
11:2, Kol 1:22

rəmwhen ia Kristo in ramətui amasan ti nakalasia me səvənhi,

³⁰ ti nəri nə mə kitaha səmwhen ia nīpərpəri nīpwran.

³¹ Rəmwhen ia Nəkukuə Ikinan rani mə,
“Ro iamīnhi irə iərman traraka ia tata mine mama səvənhi,

mevən rouarə pəri irau pran səvənhi,
nənə irau trouvehe rouəmwhen ia nīpwrai iərmama kuatia.”

³² Nəgkiariien nəha rani nari riti rasori nīpwran rərkwafə, mətə iou iakani mə raməgkiari ia Kristo mine nakalasia me səvənhi.

³³ Mətə raməgkiari mwi ia kimiaha kuatia kuatia. Ro pen iərman traməkeikei mokeikei pran səvənhi rəmwhen ramokeikei atukw a in, nənə pran traməkeikei misiai iərman səvənhi.

6

Nəkwərhakwərha me irəha tata me mine mama me səvənraha

¹ Kimiaha nəkwərhakwərha me səvəi Iərimənu, tihaməkeikei mho nəkwai tata mine mama me səkimiaha ti nəri nə mə noien i ratukwatukw mə kimiaha tihə.

² “Tikisiai səim tata mine mama.” In i loa kīməkupwən kini irau promes riti.

³ Promes nəha rani mə, “Trini minuə ikamo iamīnha irə, narimnari me ia nīmīruien səim tuhaiu amasan, nənə nīmīruien səim ia tīprənə i trəpwəmwis.”

5:30: 1Kor 6:15, Efes 1:22-23

5:31: Mat 19:5

5:32: Rev 19:7

6:1: Kol 3:20

6:2: Mat 15:4

6:3: Dut 5:16

4 Kìmiaha tata me, tihəpwəh noien nəkwərhakwərha me səkìmiaha niemaha rəpi irəha, mətə tihətoni amasan irəha, mhəkoui amasan irəha, nənə mhahatən irəha ia suatuk səvəi lərimənu.

Slef me mine nəmə asori me səvənraha

5 Kìmiaha slef me, tihəməkeikei mho nəkwai nəmə asori me səkìmiaha ia təkure tìprənə i mhehekir mhətəmnimwin, nənə tiho ia rerìmiaha pam rəmwhen a mə iəmə asori səkìmiaha in Kristo.

6 Tihəpwəh noien nəpìn kamhətoni a kìmiaha rəmwhen ia nərmama səməme kamhəmwur mə tuho nərmama rerìnraha ragien, mətə tiho nəkwənraha rəmwhen mə kìmiaha slef me səvəi Kristo, nənə mamho nəkwai Kumwesən ia rerìmiaha pam.

7 Tiho wok səkìmiaha ia nətərigien amasan rəmwhen a mə lərimənu in iəmə asori səkìmiaha, rìpko mhə iərmama a riti in iəmə asori səkìmiaha.

8 Kìmiaha hiəukurən mə lərimənu truvei pen nərəkuien m nərmama me pam ti noien amasan me səməme həno, nəri auər a mə in slef uə rìpko mhə in slef.

9 Nənə kìmiaha nəmə asori me, tihəməkeikei mhətoni amasan mwi slef me səkìmiaha iamìnha irə, mhəpwəh nəgkiari skaiien mìnraha mə tuho nəkwamìaha, ti nəri nə mə hiəukurən mə iəmə asori səkìmiaha mìnraha kuatia a fwe ia neiai, nənə in tro rəmnəmwhen m nərmama me pam.

Narimnari me səvəi naruagənien Kumwesən rìpeki pehe m kītaha

6:4: Kol 3:21, Dut 6:7, 20-25, Sam 78:4, Prov 22:6 **6:5:** Kol 3:22-23, Taet 2:9-10, 1Tes 2:18 **6:8:** 2Kor 5:10, Kol 3:24-25 **6:9:** Kol 4:1, Rom 2:11

¹⁰ Səiou nəgkiariien sampam ro iamınhi irə. Tihərer əknekin ia İərimənu səkitaha mine niskaiien asori səvənhi.

¹¹ Tihaməkeikei mharkahu narimnari me pam səvəi naruagənien səməme Kumwesən ripekti pehe m kimiaha, mə hiəukurən nərerien mhənise neikuəien me səvəi Setan.

¹² İakani iamınhi irə ti nəri nə mə kitaha səpkaruagən mhə kitaha nərmama, mətə samaruagən kitaha nənimwın me səməme kamhəuvehi nasoriien mine nərimənuuien. Irəha i nənimwın skai me səməme kamhərimənu ia noien me səvəi nəpitəvien ia təkure tıprənə i mine nənimwın ərəha me ia nimagouagou.

¹³ Ro iamınhi irə kimiaha tihaməkeikei mharkahu ia narimnari me pam səvəi naruagənien səməme Kumwesən ripekti pehe m kimiaha, mə nəpın nərəhaien sə Setan ramo ruvehe hiəukurən nərerien mhənise nərəhaien nəha. Nənə nəpın hiənaruagən pam, tihərer əknekin.

¹⁴ Ro pen kimiaha tihaməkeikei mhərer mwatuk ti naruagənien. Tihəkwətəmhiri əknekin nəgkiariien pərhiən rəmwhen kətoti sə hiərihi tərini kurkwamiaha irə. Tiho noien atukwatukw rəmwhen ia aean sə ramo tukuahag kwənpwenhimiaha.

¹⁵ Tihəvisau irapw nəgkiariien amasan səvəi nəmərinuien rəmwhen ia put skai sə rauvegi nisumiaha.

¹⁶ Tihahətətə ia Kumwesən rəmwhen ia nari sə hiaməuvehi mamhərkwafə pen irə. Ia nəri

6:10: 1Kor 16:13 **6:11:** Rom 13:12, 2Kor 10:4, Efes 4:14 **6:12:** Jon 14:30, 1Tes 5:8-9 **6:14:** Aes 11:5, 59:17, 1Tes 5:8 **6:15:** Aes 40:9, Neham 1:15, Rom 10:15

nəha hiəukurən no tukuahagien nukwai nifagə me napw rauək ia nirəha səməme iəremhə asori ramerukw ia nirəha.

¹⁷ Tihəni nīpərhiēnien ia Kumwesən mə in rauvehimīru kimiaha rəmwhen ia kəfəfau kīno ia aean sə ramo tukuahag kəmkapwəmiaha. Tihəkwtəmhiri nəgkiariien me səvəi Kumwesən rəmwhen ia nau səvəi naruagənien sə Nənimwīn Ikinan rauvei pehe m kimiaha.

¹⁸ Tihəfwaki ia nəpīn me ia nīskaiien səvəi Nənimwīn Ikinan, mamhəfwaki mamhəres narimnari me səpəmsəpə. Tihamo noien nəha, mamhətui a, mhəpwəh nəpouien, nənə mamhəfwaki ti nərmama me pam səvəi Kumwesən.

¹⁹ Tihəfwaki mwi tukw iou mə nəpīn iakuə takəgkiari Kumwesən in truvei pehe nəgkiariien miou mə takīni irapw nəgkiariien nəha məpwəh nehekīrien. Nənə takīni irapw nəgkiariien amasan səvəi Kristo sə rinamərkwafə fwe kupwən.

²⁰ Təkwtəkwuni ti nəri nə mə iakaməvisau irapw nəgkiariien amasan nəha ia nəghi Kristo, ro pen iakamarə ia kalapus. Həfwaki ro tukw iou mə takarīpīn mamīni irapw nəgkiariien amasan nəha məpwəh nehekīrien rəmwhen sə ratukwatukw mə tako.

Nəgkiariien sampam

²¹ Iou iakokeikei mə kimiaha tihəregi nəgkiariien səiou mīne nəfe iakamo ia kwopun i. Ro pen takərhi pehe Tikikas ruvehe. In piəvtaha

6:17: 1Tes 5:8, Aes 49:2, Hip 4:12 **6:18:** Luk 18:1, Kol 4:2, 1Tes 5:17 **6:19:** Wok Me 4:29, Kol 4:3-4, 2Tes 3:1 **6:20:** 2Kor 5:20, Flm 9 **6:21:** Wok Me 20:4, Kol 4:7-8, 2Tim 4:12

keikei riti sǎ kímaha iahǎukurǎn nǎtǎgiteien irǎ,
ramasitu mamó tukwini nari m Iǎrimǎnu sǎkitaha.
In trǎni pehe tukumiaha narimnari me pam.

²² Takǎrhi pehe in tukumiaha tǎ noien í, mǎ in tro
kímiaha hiǎregi ramasan, mǎni irapw tukumiaha
mǎ kímaha iahamǎfarǎ irǎ.

²³ Pwǎh Tata Kumwesǎn mǎne Iesu Kristo
Iǎrimǎnu sǎkitaha trouǎriari pehe nǎmǎrinuien
mǎne nokeikeiien m kímiaha, rauo nahatǎtǎien
sǎkímiaha riskai.

²⁴ Pwǎh Kumwesǎn trǎriari pen namasanien
sǎvǎnhi m nǎrmama me pam sǎmǎme hokeikei
Iesu Kristo Iǎrimǎnu sǎkitaha ia nokeikeiien sǎ
trǎpkiwǎn mhǎ.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416